

L E

L'empereur

## PHILOTHEMIS

DISCITE IVSTITIAM

moniti &amp; non temnere diuos.

**L'**Aigle ayant esclors ses petits, pour recognoistre & discernet les siens d'auec les bastards, & supposez, a de coustume de les presenter aux clairs rayons du Soleil, & leur faire regarder fixement la viue clarté de ce grand flambeau, de telle sorte qu'elle chasse hors de son nid ceux qui ne la peuuent supporter, estant par ce seul moyen auérés pour bastards. Voulons nous recognoistre en ce temps vn bon & genereux François, auec vn fein & simulé, lequel toutesfois contrefaißt l'homme de bien & le magnanime, il nous conuient faire le semblable, & l'opposer au Soleil de Iustice, qui de son esclat confond soudain les meschans, la veuë desquels est trop foible pour souffrir vne si viue lumiere, qui penetre iusques au plus profond de leurs cœurs, trauaillez & martyrez d'vne continuelle apprehension de leurs crimes & semblables aux chasseurs, lesquels ne peuuent porter la lueur & serene clarté

d'un beau iour. Ainsi les meschans que l'on peut appeller hybous & vrayes oyseaux nocturnes & de malencontre, hayssent d'une hayne mortelle la Iustice, qui met au iour leurs malices, & qui mal-gré eux tire de leur propre bouche la confession de leurs forfaits, & en ceste maniere tous ceux qui ont l'ame cautherisee & affoiblie par leurs iniquitez, sont distinguez & separez des bons, & recongneus pour tels qu'ils sont. Et ne faut s'estonner si ces malheureuses ames ne se nourrissent que de venin, ne respirent qu'un mauuais air, (comme aucuns animaux des Indes) & ne se plaisent que parmy la confusion & le desordre, taschant par toutes voyes de suffoquer & estaindre la force & la vigueur des loix, offusquer le lustre & splendeur de la Iustice, & la deposseder de son throne ancien : pour à quoy plus facilement paruenir ils s'attaquent aux principaux ministres de la iustice, qui sont les magistrats qu'un ancien appelle *loix parlantes*, lesquels estans hors de credit, il est indubitable que les loix qui sont les *Magistrats muets*, ne peuuent aucunement subsister.

Mais au contraire les bons François vraiment magnanimes & courageux, amis de l'Estat, jaloux du bien public, fidelles & immuables au seruice de leur Roy, rendent toute sorte d'honneur & obeyssance à ceste sainte Deesse *Themis*, laquelle nous rend agreables à Dieu, nous faict approcher de

plus pres de sa diuinité que chose qui soit au monde, & rend nostre ame toute celeste & diuine. Ceux-là dis-je qui ont vne ame de pur or (ainsi Platon appelle les belles ames) & qui n'ont iamais saly leur front, chargé leur honneur, ny terny leur gloire du blasme d'aucuns crimes, qui n'ont apporté de la honre à leur sang, & de scandale à leur nation, embrassent d'un extreme affection la Iustice, reuerent grandement les administrateurs d'icelle & obeyssent entierement à leurs commandemens.

L'experience pour les occasions qui se presentent maintenant deuant nos yeux, donne vne preuue assez claire & suffisante de mon dire, sans qu'il soit besoin & necessaire d'en rechercher d'autres & plus particulieres raisons: Car ne voyons nous pas en France, & en la ville capitale de tout le Royaume, & mesme dans le sacré temple de *Themis*, les plus grands & les plus vertueux Princes, aymer & honorer la iustice sur toutes choses: Au contraire ne voyons nous pas à nostre grand regret vn homme insolent, impie, esleué de la poussiere, enfant de la fortune, qui est entré dans le temple de l'honneur sans passer & entrer premierement dans celuy de la vertu, homme deuenu grand & enrichy aux despens du pauvre peuple, enflé comme vne sangsue du sang & moyens des pauvres subiects du Roy, qui s'est efforcé de fouler aux pieds la Iustice: & ne s'est contenté de mespriser le



pouuoir des Iustices ordinaires & subalternes de ce Royaume, en brisant & forçant leurs prisons : ains par vne outrecuidance & malice innouye, à osé entreprendre contrel'autorité souveraine des Cours des Parlemens, & attenter iusques à la personne mesme des officiers de la Majesté & souverains Magistrats, entrant à main armee iusques dans le Palais, le sacré sanctuaire de Iustice : forfaict le plus scandaleux qu'on ait iamais veu attentat de tout estrange & inouy en France, mesmes en temps de paix !

Par la loy de Solon, il estoit permis à vn chascun de prendre & espouser la querelle de celuy qui auroit esté outragé en la ville d'Athenes, & si on eust trouué le moindre Bourgeois blessé, battu, forcé ou autrement endommagé en son corps ou en ses biens, ou en son honneur, il estoit non seulement loisible, mais encore enioinct & commandé à vn chacun d'appeller l'outrageant en Iustice, & le poursuiure aussi asprement à la reparation de l'iniure comme s'il l'eust receuë luy mesme : Ce qui fust sagement ordonné à luy, pour accoustumer ses citoyens à se ressentir & se douloir du mal les vns des autres comme d'un membre de leurs corps qui auoit esté offensé & interessé. A combien plus iuste raison il doit estre loisible maintenant, voire mesmes commandé à tous les François de vanger l'iniure faicte à la Iustice, qui est l'un des premiers & plus nobles membres du corps de l'Estat,

lequel estant affligé & offensé tout le reste des membres demeureroient malades & languissans : car ne plus ne moins que la force du corps decline à mesure que la chaleur naturelle d'iceluy va décroissant : ainsi la vigueur del' Estat diminuë au pris que la puissance des Magistrats s'appetisse. Le fils de Cresus paruant muet, si tost, qu'il apperceut le meurtrier qui portoit le bras pour percer d'un couteau son pere denoüa sa langue & rompit le fillet d'icelle (transporté de sa vehemente affection & de la grande apprehension du coup) & commença à s'escrier soudain, *ne touches point au Roy mon pere*, de mesmes apres auoir gardé long temps religieusement & inuiolablement le silence, ie suis forcé de parler par la vehemence de la douleur que ie sens, voyant qu'on s'attaque directement à l'autorité Royale, en s'attaquant à la iustice, & qu'on veut mettre maintenant toute la France en confusion & desordre, & troubler le calme de ma chere patrie, pendant le regne heureux de nostre ieune Roy (soubz le sceptre duquel elle respire atjourd'huy graces à Dieu, vn Estat paisible, plain de repos & tranquillité.) Je ne puis fermer la bouche lors qu'il faut parler pour l'interest du public, & tesmoigner du moins de parolle, si l'on ne peut en effect, l'affection que ie dois au Roy, au public & à la Iustice, comme estant bon & fidelle François : c'est le seul desir & le zele qui me faict dire tout haut ces parolles, & les



tire du profond de mon cœur. *Ne touche point au Roy ou à son authorité, ne nous fais point rechoir aux malheurs & aux pleurs desquels il n'y a pas long temps que nous sommes sortis, & retirez par la toute puissante main de Dieu.* Nous auons à peine essuyé nos larmes, & sommes encore mouillez du naufrage de nos dernieres calamitez & miseres publiques (desquelles le peuple qui est ordinairement (comme l'on dit) la voix de Dieu t'en attribué la principale cause: car il est persuadé de le croire par plusieurs presomptions, plusieurs argumens & plusieurs tesmoignages, dont il en reste encore enuie vn seul que Dieu conserue pour te confondre vn iour, & te faire aduouër tes crimes plus execrables, & toutesfois cruel & inhumain, tu as faict n'agueres tous tes efforts par tes conseils, pour nous plonger en vne guerre ciuile, & nous veux encores précipiter en des nouveaux mal'heurs, si Dieu n'arreste tes mauuais desseins.

Meschant tu attaques veritablement le Roy, en attaquant la Cour de Parlement, la Cour des Pairs, & à laquelle il a resigné la plus grande & plus importante charge de la Couronne, qui est l'administration de la Iustice souueraine, Cour tres-celebre & renommee, à laquelle non seulement les particuliers, & les Princes du sang Royal de France, mais encore les Roys estrangers ont deferé le iugement de leurs differens, comme nous lisons dans les histoires de certains Roys d'An-

gleterre & Ducs d'Aquitaine. Tu attaques la Royauté en luy voulant ravier le plus beau fleuron de sa Couronne, qui est sa iustice, & diminuer la force & l'autorité de son Parlement, qui luy sert comme de rempart à son autorité suprême, & d'une ferme tour & arcenal bien muni contre les pernicioeux conseils, menees & mauuais dessains de ses ennemys, contribuant par son continuel soin & vigilance, par sa prudence & integrité au salut de sa Majesté & manutention de la Couronne (ainsi que nous en auons des euidentes preuues & marques depuis la mort de nostre grand Henry, par le bon ordre & soudain reglement que ce Parlement fit à la declaration du Roy & Regence de la Roynes.) Tu veux troubler le repos de la Couronne en mesprisant & outrageant la Iustice, de laquelle depend le vray appuy de la vertu, & la conseruation de la société humaine qui est l'un des principaux nerfs du corps Monarchique, & la principale colonne d'un Royaume ou Empire: Et ie ne scaurois assez detester ta perfidie & meschanceté, ny descouurir toutes tes malices.

*Non mihi si linguæ centum sint oraque centum,  
Ferreæ vox omnes scelerum comprehendere formas  
possem.*

Puis que tu tasches de mettre tout en desordre en voulant perdre & supprimer l'exer-

cice de la iustice, qui est aussi nécessaire & im-  
 portant à la conseruation du Royaume, qu'est  
 le Soleil du monde pour l'entretien de l'vni-  
 uers. Tu as voulu raurir l'honneur & l'obeyf-  
 sance deuë aux Magistrats & à tes Iuges, qui  
 ont receu du Roy vn plain pouuoir, par ma-  
 niere de dire, au gouuernement de la chose  
 publique, & tiennent de sa Majesté la puis-  
 sance de iuger, de l'honneur, de la vie & des  
 biens de tous ses subiects. Car ne plus ny  
 moins que Hercules ainsi que les Poëtes fei-  
 gnent, alloit par tout le monde avec sa mas-  
 suë & sa peau de Lyon punissant les volleurs,  
 & exterminant tous les monstres cruels & in-  
 humains qui gastoient & rauageoient les Pro-  
 uinces, de mesme les Cours de Parlement  
 avec vn billet de parchemin ou sont leurs ar-  
 rests, & la verge ou parole d'un Huissier ou  
 autre officier d'icelles renuersent & extermi-  
 nent ceux qui vsurpent domination violante  
 sur leurs concitoyens, decidans leurs querel-  
 les particulieres, & appaisans leurs seditions  
 (lesquelles autrement pourroient troubler la  
 tranquillité publique) sans faire marcher vn  
 seul homme de guerre. C'est là ou se mon-  
 stre clairement la grandeur & puissance du  
 Roy & l'entiere obeyssance de ses subiects,  
 & le soin particulier que sa Majesté a de leur  
 protection, ne permettant ainsi par l'assistan-  
 ce de ses Cours souueraines qu'aucun des  
 siens viue desreglément dans le desordre, &  
 retirant le foible de la main du puissant : C'est  
 pour



pour ceste raison qu'il a iustement & sainctement estably ce grand & suprême tribunal de iustice, armé & authorisé de force & de puissance pour conseruer les bons, chastier la felonnie & desobeyssance des meschans, & contenir en leur deuoir ceux qui auroient volonté de mal faire par la crainte des peines & seuerité des loix.

Mais on me dira peut estre que tu as voulu par tes deportemens insolens authoriser & conseruer les priuileges des soldats lesquels il semble de droict qu'ils ne doiuent respondre que deuant leurs Iuges, & ne sont iusticiables des Cours & iustices Royales & ordinaires.


A quoy ie responds premierement que quand il s'agist du crime de soldat & qui est contre les reigles prescrits en l'art de la milice & contre le deu de sa charge, alors cela ne reçoit aucune difficulté que la cognoissance n'en appartienne à ses Capitaines, Preuosts, ou autres Iuges establis pour ce faire: Mais quand il est question d'un crime public, ou contre les loix & ordonnances du Roy, la cognoissance seule en appartient aux Iuges ordinaires, selon les Edicts du Roy, & ordonnances obseruees en France de temps immemorial, priuatiuement à tous autres. Et quand cela seroit que les loix en donnassent la cognoissance à leurs Capitaines, (ce que non) il falloit proceder par les voyes deuës & raisonnables, en tel cas requises, & imiter la prau-

dence de ce grand Capitaine des bellicieux Gaulois, nommé Brennus, lequel au milieu de ses armées, ayant droict de se plaindre & de faire guerre ouuerte aux Romains, pour le tort qu'il auoit receu de Fabius Ambustus, qui auoit violé le droict des gens, ne voulant pourtant proceder dès le commencement par la force des armes, ains demanda iustice aux Romains, encor qu'il eust le moyen & le pou- uoir de se la faire luy-mesme, comme il mon- stra puis apres, quand sa iuste requeste ne luy fut accordée. Aussi le plus grand tesmoigna- ge de la prudence, vaillance, & droicture des anciens Gaulois, a esté l'honneur & l'obeyf- sance qu'ils ont tousiours renduë aux loix & à leurs iuges qui estoient les Druides. Il te fal- loit donc pour maintenir ces pretendus priui- leges militaires recourir au Roy, & à la Iusti- ce, & non pas de ton autorité priuée & par la force des armes te vouloir rendre la iustice à toy mesme, contre tout droict & raison, tu eusse beaucoup mieux faict, & eusses fait plus de plaisir aux soldats, si tu leur eusses rendu l'entiere paye de leurs monstres, partie de la- quelle leur est vollee, par toy ou par tes sup- posits. Mais on dira que tu as depuis peu re- paré la faute, & satisfait à la Cour par les sub- missions que tu luy as n'agueres renduës, sui- uant le conseil de tes bons amis. Non, non, tu n'as pas encore souffert la peine deuë à tes demerites, le remede est trop doux pour gua- rir vn si grand mal, & la tasche est telle qu'elle

ne se peut si aisement effacer, ains demeurera  
 tousiours empreinte, & marquera ta memoire  
 par vne note d'infamie perpetuelle. I'ad-  
 uouë veritablement que c'est vne peine bien  
 douce, mais elle est accoustumee à la douceur,  
 clemence de nos Roys, & au doux naturel des  
 François, les loix delquels pour le regard des  
 grands sont escrites de miel, & non de sang  
 comme les loix de Dracon, ainsi que disoit  
 Democritus. D'ailleurs nous deuons esperer que  
 Dieu qui est le iuste Iuge, te punira selon tes  
 demerites, & que tu n'eschappetas sa Iustice,  
 si tu eschappes celle des hommes, & qui ne  
 croira que Dieu commence ses chastimens,  
 puis qu'il t'a osté desia l'vsage de la raison au  
 declin de ton aage, lors que tu en deurois vser  
 plus que iamais, car estant enyuré des dou-  
 ceurs de ta prosperité, & ayant eu tousiours  
 fortune fauorable iusqu'à present, tu feras, à  
 ce que i'estime, comme vn bon coureur, qui  
 par mal'heur se laisse cheoir au plus pres du  
 bail de sa carriere. Ainsi ayant eu durant toute  
 ta vie du bon heur, & par tes douces parolles,  
 piperies & subtils artifices, attire à toy des  
 dons immenses & faueurs Royales, dont tu  
 estois indigne, tu te precipiteras toy-mesme à  
 la fin au mal'heur, & te renuerseras du plus  
 haut de la rouë où tu és monté. Les histoires  
 sont remplies des exemples de ceux qui sont  
 morts aussi mal'heureusement qu'ils ont ves-  
 cu, & nous assurent que Dieu qui est le grand  
 & iuste Iuge, retardant & differant souuent le



supplice des meschans, *tarditatem supplicij Gra-  
 uitate compensat.* Mais vous, ô Generex Fran-  
 cois, qui aymez nostre Roy, & par conse-  
 quent les Magistrats & Officiers qu'il a esle-  
 uez au Throïne de sa Iustice pour conseruer  
 la candeur des fleurs de Lys, & asseurer le re-  
 pos de ses subiects, soient semblables à ceste  
 belle fleur, qui se tourne vers le Soleil, de quel  
 costé qu'il aille, & que vostre face & toutes  
 nos actions s'enclinent tousiours vers la Ma-  
 jesté, ne goustant d'autres fruidts que ceux de  
 l'obeyssance & de la fidelité, & ayez tousiours  
 ferme en vos cœurs l'amour de vostre Roy, &  
 de la Iustice, laquelle vous conduira à l'im-  
 mortalié desirée, & vous acquerra vne vraye  
 gloire, & vn repos asseuré.



DC123.3 P36 no.160